

Regional News Unit AIR Aizawl
Tuesday, September 03, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Fur ruahtui tla tam lutuk avanga harsatna tawk nasa tak, Mamit District ah inkalpawhna kawng ping te haifai a ni nual tawh a, ei leh bara harsatna tawk an la awm lo bawk a ni.
- State puma hman turin, ei leh in tha pek inzirtirna pual Rastriya POSHAN Maah 2024 chu nimin khan Women & Child Development Office, Aizawl ah hawn a ni.
- Union Cabinet chuan loneitute khawsakphung chawikang tur leh an sum lakluh ti pung turin nimin khan cheng vaibelchhe 14,235 senna tur scheme pasarih a pawm.
- Indian Air Force (IAF) MiG-29 fighter jet chu nizan khan Rajasthan-a Barmer ah a chesual a, vanneihthlak takin thi leh hliam an awm lo.

<><><>

DISASTER

Fur ruahtui tla tam lutuk avanga harsatna tawk nasa tak, Mamit District ah inkalpawhna kawng ping te haifai a ni nual tawh a, ei leh bara harsatna tawk an la awm lo bawk a ni.

Nimin khan Mamit DC Conference Hall-ah tunhnaia fur ruahtui nasa tak avanga Mamit District chhunga chhiatna hrang hrang thlir hovin District Disaster Management Committee Chairman Pu Jacob Lalawmpuia District Bawrhsap ni bawk hovin an thutkhawm a. He huna tarlan anih dan chuan, PWD Highway Mamit Division huamchhungah kawng min 24 awmin, heng zinga 21 chu thenfai a, tih tlang a ni tawh a, kawng tih tlang tawhah hian ruahsur a nasat chuan min leh mai thei dinhmuna awm a awm nual a ni.

Tuidai bul min chu engtikah nge a tlang ang tih sawi theih mai a ni rih lo a, Mausem kawnglui lam zawh theihin awm tawh mahse kawng enkawl lohna rei tawh a nih avangin lirthei lian chi tana tlan harsa lai ala awm a, hemi kawng thawmthata chei thatna tur pawh thuneitute hnenah thlen mek a nih thu tarlan a ni.

PWD Mamit Division huamchhungah khawchhung kawng min neuh neuhte thenfai nual a ni tawh a, Mamit atanga Phaizau panna kawng pawh tunkar chhunga sial tlang theih beisei a ni a. Mamit leh Bairabi kawng pawh leimin avang hian kalflang theih ala nilo a ni.

PHED Department tarlan danin Phaizau atanga Mamit tuilakna kawng leimin avang hian a chhe vek a, tunah hian theihtawpa hnathawh a ni chungin kar 2 chhung vel tui lak luh theih a ni dawn lo a,

Power & Electricity Department, Mamit Division huamchinah pawh leimin avanga electric ban tlu leh awn a tam hle a, Bairabi leh W.Phaileng Mamit kaltlanga eng lakluhna Tower pakhat a bul leimin avangin dinhmun hlauhawmah awm mekin a dang dinhmun erawh kawng tlang loh avanga la chian loh a awm bawk ni.

Buhfai dinhmun erawh a hlauhthawnawm lutuk lova, kawng kal harsa zual Godown pariatah Oct leh Nov thla thleng stock a awm a, Godown pali Mamit, W. Phaileng, Phuldungsei, Pukzing te erawh an thlamamawh dan a zira pek thin an ni. Oil lamah thlaphanna tur erawh a awm rihlo a thudawn a ni a, LPG trip rawn kal mek a awm thu dawn a ni bawk.

District Hospital-ah tunhnai khuarel chhiatna an tawrh avanga hliam emaw harsatna tawk an awm report dawn a nilo a, chhiatna thlen thulha inbuatsaihna erawh kalpui a nih thu tarlan a ni bawk.

Pu Jacob Lalawmpuia chuan tunhnaiah ruah nasa tak avangin harsatna hmun hrang hrangah an tawk a, district ang zawng pawhin a tuar nasa ber an ni a a hriat thu a sawi a, mipui nunphung ti khaihlak thei inkalpawhna kawng ping, eng leh tuiah te an tuar nasa hle a ti.

Meeting-ah hian W.Phaileng BDO, Reiek BDO leh Kawrtethawveng BDO atangin an huam chhunga chhiatna leh harsatna an tawhte ngaihthlak a ni a, Mamit khawpui chhunga Village council paruk atangin an vengchung dinhmun hrang hrang ngaihthlak a ni bawk.

Hetihlai hian Mizoram sorkar chuan ruah tui hi la tla belh zel thei a nih avangin hemi in a nghawng theih lakah mipuite fimkhur turin a chah.

Sorkar thuchhuah tarlan dan chuan, kumin hian fur ruahtui a tlak tam avangin Mizoram hmun hrang hrangah chhiatna thleng a tam hle a. Leimin avanga mithi leh in leh lo chan mi engemawzat an awm a. Hmun hrang hrangah leimin avangin inkalpawhna lamah pawh harsatna tam tak a thleng bawk. Heng chhiatna thleng te hi sorkar chuan pawh a tiin a tuartute pawh a tawrhpuh takzet a, mipuite harsatna su kiang tur hian theihtawpin hma a la mek reng a ni, a ti.

Khaw chin thlirtu - India Meteorological Department (IMD) chuan ruah hi la sur chhinzawm zel turin a tarlang a. Mizoram leilungte a hnip tawh avang leh chhiatna thleng thut thei hmun hrang hrangah a awm avangin mipuite fimkhur theuh turin an ngen nawn leh a. Mahni in leh a vel a tui kal dan te ennawnin, leimin thei hlauhawm leh chhiatna lian tham thlen thei awm a awm chuan thuneitute hnenah a rang lama hriattir zel turin mipuite an ngenin an hriattir bawk a ni. Ruahsur nasa avanga kawng hrang hranga harsatna awm theiah, sorkar department hrang hrangte mahni mawhphurhna theuh hlen tura theihtawp chhuah turin an ngen nawn leh bawk a ni.

<><><>

FEMSE

Federation of Mizoram Samagra Shiksha Employees (FEMSE) chuan, hlauh an la thei lo zel a nih chuan, an membrete'n September ni 5 Zirtirtute Ni lawmnaah Badge dum bel an tum.

FEMSE chuan thuchhuah siamin, Samagra hnuiaia thawkte'n thla thum hlauh an la tawh lo tih an tarlang a, a chhan hrang hrang zingah sorkar laipui atanga sum lo thleng, hun rei tak state sorkar Treasury lamin a hrên khawtlai vang a ni, an ti.

FEMSE Council chuan, an dinhmun ngun taka an ngaihtuah hnuah kumina Teachers Day chu badge dum bel chung a hman an rel tih tarlangin, Samagra hnuah thawk zawng zawngte lungrual taka FEMSE Council rorel hi zâwm turin an inngen a; an dinhmun hriatsak a, a rang thei anga hma laksak turin sorkara thuneitute an ngen bawk.

Zirtirtute Ni a badge dum bel an tum thu hi FEMSE chuan August ni 29 khan ziakin Education Minister an hrilh tawh a; dinhmun khirh takah an awm thu tarlangin, hun rei tak hlawh la loa an awm chhan chu Mizoram Treasury-in Samagra sum nuai 773 chuang rei tak a hren khawtlai vang a ni, an ti a. A huna sum pek chhuah loh avangin sorkar laipui ațanga sum lo kal leh tur a ti khawtlia niin an sawi bawk.

<><><>

POSHAN MAAH

Directorate of Women & Child Development buatsaih Rastriya POSHAN Maah 2024 chu nimin khan Women & Child Development Office, Tuikhuahtlang ah hawn a ni a,

Hawna inkhawm hmanpuitu, Social Welfare, Tribal Affairs, Women & Child Development Department Pi Lalzarmawii chuan Rastriya POSHAN Maah 2024 kalpui tur chu ram hriselna atana hmasawna rahbi pawimawh tak a nih ngei a beisei thu leh hriselna, hmasawna leh changkanna chu department kutah thui tak a inngah thu a sawi. Thawktute chu mipui tana programme siamte zirchianga a hlawhtlin nana theihtawp chhuah turin a chah a ni.

Women & Child Development Director Pi Zoramthangi Chhangte chuan. Kumin atana thupui thlan 'Overall Nutrition' hnuah hmalak dan tur theme hrang hrang duan pangnga a sawi a, chungte chu - Anaemia (Thisen tlakchamna beih kawnga test runpui), Growth Monitoring (Thandan endik runpui), Complementary Feeding (Nau chaw hrai dan chungchang), Poshan Bhi Padhai Bhi (Chaw tha pe la zirtir tha bawk rawh) tih leh Technology for Better Governance, Transparency and Efficient Service Delivery te a ni a, department hmalakna chu mipui nun khawih thil, an tana malsawna, damna leh himna a nih avangin thawktute chu an hmazawna tihtur theuhte theihtawp chhuaha tha taka hlen chhuah tum turin a sawm a ni.

POSHAN Maah (Nutrition Month) hi Sawrkar laipui Ministry of Women & Child Development hnuah Nutrition Mission lian tak POSHAN Abhiyaan hmalakna zinga programme pawimawh tak pakhat niin, kum tin September thla chhunga hman thin a ni a. Kumin hian a tum 7-na atan Ministry of Women & Child Development ruahman angin Poshan Maah 2024 hi hman leh tum a ni.

<><><>

LUNGLEI

Sikul naupangte sikul bag rit lutuk avanga zirlaite'n harsatna an tawh loh nana hma lak dan tur ngaihtuahin nimin khan Lunglei DC Conference Hall-ah District Bawrhsap Pu R. Lalțhazuala kaihhruaiin țhut khawm buatsaih a ni.

Lunglei Bawrhsap Pu R. Lal̄hazuala chuan Mizoram sawrkarin April ni 30, 2021-ah sikul naupang bag rit lutuk chhawk zangkhai tur inkaihhraina a lo chhuah tawh thu sawiin, Lunglei District-ah pawh a theih chin chinah bawhzui a nih rualin, tun dinhmunah engtia kalpui nge ṭha ang tih ngaihtuah turin inrawn khawm chu buatsaih a ni, a ti a. Naupangte chu zirna ṭha pek ngawr ngawr piah lamah, an sikul kai ip rit lutukin an hriselna a nghawng thei em tih te pawh ngaihtuah a, naupangte ṭanghma atan ruahmanna siam a pawimawh a ni, a ti.

He hunah hian ip rit lutuk nena ni tina sikul kal ṭhin naupangte hriselnain a tuar theih dan tar lan niin, zangkhai zawka kalpui a nih theih dan tur sawi ho a ni a. He harsatna su kiang tur hian School Education Department-in April ni 30, 2021-a thu a lo chhuah tawh chu District Education Officer-in government leh private sikul zawng zawngah Mizo ṭawngin thawn chhuak se, tih a ni a. Sikul tinah lekhabu dahna neih theih dan tur ruahman ni se tih a nih bakah, sikula zir hunbi mila lekhabu thlak lova lekhabu zawng zawng ken vek chuan bag a tihrih zual avangin routine anga lekhabu ken turte chu nu leh pate'n enpui bakah, zirtirtute'n an subject mamawh chauh keng tura hrilh hriat ni se, tih a ni a. Sawrkar inkaihhraina angin ni khatah Class I & II tan subject 3, Class III - V tan subject 4, Class VI - X tan subject 6 angin kalpui ni se; homework pek chungchangah ni tin primary school-ah subject 1, middle School-ah subject 2 leh high school & higher secondary school-ah subject 3 aia tam pek loh ni se, tih a ni bawk.

He hunah hian sikul tinah zirlaite'n tui in tur thianghlim leh hnianghnar an neih theih nan ruahmanna siam ni se, tih a ni a. SCERT-ah sikul exam term khata zir tur ang zela zirlaibu siam tura thlen rel a ni bawk.

He ṭhut khawmah hian official lam - DEO, DCPO, DPO(WCD), SDEO North/South te, ṭlawmngai pawl, zirlai pawl leh zirtirtu pawl hrang hrang hruaitute leh private leh kohhran sikul hrang hrang ai awhte an tel a ni.

<><><>

UNION CABINET

Union Cabinet chuan loneitute khawsakphung chawikang tur leh an sum lakluh ti pung turin nimin khan cheng vaibelchhe 14,235 senna tur scheme pasarih a pawm a.

Union Cabinet chuan cheng vaibelchhe 2817 senna tur Digital Agriculture Mission a pawm a. Union I&B Minister Ashwini Vaishnaw chuan hemi chungchang hi New Delhi-a chanchinbumite hrilhin loneitute khawsak hmasawna tur leh an sum lakluh ti pung turin Union Cabinet chuan Digital Agriculture Mission hi a pawm a ti a. Digital Public Infrastructure hmalak mekna nena kalkawp tura tih anih thu a sawi.

Union Cabinet hian crop science cheng vaibelchhe 3979 senna turte, agriculture education, management leh social science atan cheng vaibelchhe 2291 senna turte a pawm bawk a. Ranvulh te hriselna leh an tharchhuah ti tam turin cheng vaibelchhe 1702 hu hmalakna leh Horticulture tihhmasawna tur cheng vaibelchhe 1129 senna tur a pawm a. Krishi Vigyan Jendra ti changlung turin cheng vaibelchhe 1202 senna tur leh leilung hausakna tangkai taka hmanna tur natural resources management atan cheng vaibelchhe 1115 a pawm bawk.

Hei bakah hian Mumbai leh Indore inkalpawhna tur rel kawng km 309-a thui siam nan cheng vaibelchhe 18.036 a pawm bawk a. He project hi kum 2028-29 ah zawh hman beisei a ni.



TOURISM MINISTER

Union Tourism and Culuture Minister Gajendra Singh Shekhawat-a hoin nimin khan Shillong ah Tourism Ministers' Conference neih a ni. He hunah hian hmarchhak state, ramchhung chhak lam state leh Union Territories-a Tourism Minister te an kalkhawm a. Pu Shekhawat-a chuan thusawiin ramchhunga tourism thanna leh hmasawn nan conference chu huaihawt a ni a ti a. State leh UT te thawhhona tha lehzual an neih theih nana inhmukhawm an nih thu a sawi.



IAF

Indian Air Force (IAF) MiG-29 fighter jet chu nizan khan Rajasthan-a Barmer ah a chesual a, vanneihthlak takin thi leh hliam an awm lo. IAF thuchhuah danin thlawhna hi tihdan phunga training mission-a thlawk chhuak a ni a, khawl lamah buaina a tawh hnu lawkah pilot hi thlawhna atangin a inkap chhuak hman a ni. Thlawhna chesual avang hian thi leh hliam an awm lo hlauh niin IAF thupuangtu chuan a sawi a. Chhiatna thlen dan chhui tur hian Court of Inquiry kaltir nghal a ni.

